

## PITA TAKADA PLADE

### *Yāpurakpana sísina kũ Luda ó sísia*

<sup>1</sup> Makũ Simo Pita, Yesu Kirisi zòblerii, a zìrii, makũme ma takada dí kè gbě kũ ó Luda ó Surabari Yesu Kirisi n gbá zé ò a náani kè lán ó bà à manake gáinone. <sup>2</sup> Gbêke kũ aafiaao gõ papanaáwa Luda kũ ó Dikiri Yesuo dõnaa gũn.

<sup>3</sup> Luda ó sé ògõ kú a gakuri kũ a manakeo gũmme, à tò ó a dõ, akũ a Ludakegbãna ó gbá pó kũ à kũ ògõ vĩ, de ó kunna le à ke lele kũ a yão. <sup>4</sup> Len à yã zõkõ bèereede kũ à a lé sèwewenõ kè le, de a yã ò bo andunia dà vãni kũ àdi n yaka gũn ò Luda kunna taka sé. <sup>5</sup> Yã bire yã à kokari ke manamana, à Luda náani ke manakena gũn, à yã mana ke dõnaa gũn, <sup>6</sup> àgõ dõna vĩ á zĩda kũnaa gũn, àgõ á zĩda kũna dõ mena gũn, àgõ mena vĩ nana Ludaii gũn, <sup>7</sup> àgõ nana Ludai kõgbêke gũn, àgõ gbêke vĩ kõo yenyĩ gũn. <sup>8</sup> Zaakũ tó á yã bireno kũna, akũ òten kara, áni gõ kun pã karanaa sariro ó Dikiri Yesu Kirisi dõnaa gũn. <sup>9</sup> Gbê kũ à yã bireno kũna sõro, à a wé nàkõa, à gõ vĩna ùme. À sãn kũ Luda durunna kũ à kè yãno kèare. <sup>10</sup> Abire yã ma gbẽno, à kokari ke à yãpura kpá sísina kũ Luda á sísi à á séa. Tó áten yã bireno ke, áni fu zikiro. <sup>11</sup> Lemẽ oni gbãnake kpáái manamana le, áni gõ kú kũ ó Dikiri ó Surabari Yesu Kirisio a kpata kũ àdi lákaro gũn.

<sup>12</sup> Abire yãime, bee kũ á yã bireno dõ, akũsõ á zĩni petena yãpura kũ á kũnaa gũn, manigõ yã pino dõágume. <sup>13</sup> Gõro kũ má kpé kú ma sòo gũn, maten

da à mana màgõ té káágu yã pìnɔ dɔnaágu yãí. <sup>14</sup> Má dõ kũ ma bona ma sòn gɔɔ ni ká tera, lákũ ó Dikiri Yesu Kirisi gĩnake à òmene nà. <sup>15</sup> Mani kokari ke, de yã pìnɔ le àgõ dɔágu gɔɔ sīnda pínki ma ga gbera.

### *Kirisi gakuri sèdadens*

<sup>16</sup> Kũ o ó Dikiri Yesu Kirisi suna kũ gbãnao òáre, ódi té gara kũ ò dà kũ òndõooiro. O wé kè pla kũ a zõkõkeome, <sup>17</sup> gɔɔ kũ De Luda bèere lìnè à a tó bò. À Luda zõkõ gakuride kòtoo mà à pì a Né mèn do légelege yenyīden a ũ, a yã dì káagu. <sup>18</sup> O kòto kũ à bò ludambe pìi mà gɔɔ kũ ó kú kãao kpi kũ à kú adona musu. <sup>19</sup> Abirekũ mòwewe kũ yã kũ annabinɔ ò bi yãpurame. À mana à laakari dɔ yã pìia fitila kũ àten gu b̀ruburu pu ũme ari gudɔo susune gõ gé fute á swèn, de gu le à dɔáwa. <sup>20</sup> À kũ à deńla sà àgõ dõ kũ gbẽke dì fõ à yã kũ annabii kè Luda yãn b̀kɔte a zĩdaro. <sup>21</sup> Annabinɔ yãke dì bo bisāsiri poyeinaa gũnlo, ò Luda yã ò lákũ a Nini dònne are nàme.

## 2

### *Ekéyádannerinɔ*

<sup>1</sup> Annabi ékenɔ bò yã Isarailanɔ té. Lemé ekéyádannerinɔ ni bo á té le se. Oni éke kũ àdi tó ò kakate ká Luda yádannenan, ò ledi kpá Dikiri kũ à n bóí, oni n zĩda kakate kãnto. <sup>2</sup> Onigõ tényĩ dasi n wé'isariyãkenaa gũn, oni yãpura zé vãni bo n yãí. <sup>3</sup> N wákũkenaa gũn oni á ble kũ éke kũ òdi bleao. Yãkpatè vùterímma à g̀i kè, i dì na n Kakateri wénlo. <sup>4</sup> Zaakũ Luda dí malaika kũ ò durunna kènɔ tóro, à n ká tònɔwewe sira kũ à kú zĩtezĩte gũn, àgõ

ń kũna ari yãkpatεkeεγɔɔ zĩ. <sup>5</sup> Adi andunia zĩ kũ a yãdarisari kũ ò kú a gũnno tóro, à tò í dànlá. Ama à Nuhu kũ àdi manakεna waazi ke bò kũ gbēnɔn suppla pāndenɔ. <sup>6</sup> À yā dà Sɔɔmu kũ Gɔmɔraola à ń kákate ò gǝ túbu ũ, à ń ké le yā kũ ani ludayādarisarinɔ le sèeda ũ. <sup>7</sup> Ama à Lutu bò, gbē mana kũ a nèseε yàka dokadarisari pìnɔ wé'isariyākεna yāi. <sup>8</sup> Gbē mana pì kú ń té, yā vāni kũ àten e akūsǝ àten ma lákũ gu dìgǝ ɔ̀ nà ùa kũ a nèsemana yāi. <sup>9</sup> Lemε ɔ̀ Dikiri gbē kũ ò naainɔ bona yɔogwanaa gũn zé dǝ, akūsǝ à gbē vāni kũna dǝ de à wé tāa yãkpatεkeεγɔɔ zĩ. <sup>10</sup> A pāsĩn sà gbē kũ òdi iko gya bonɔ ũ, ń mè dà vāninɔ mé àdi doñne are gbāsĩkenaa gũn.

Ekεyādannerii pìnɔ bi kùgbānade karam-baanidenɔmε. Dɔkεna kũ malaika gakuridenɔ dì ń gba vīnaro. <sup>11</sup> Malaika kũ ń gbāna kũ ń ikoo de gbē pìnolanɔ dì we ò ń tó bène sí ò yā dińma Dikiri arero. <sup>12</sup> Gbē pìnɔ dì yā kũ ò a gbá dǝro bène bomε. Bisāsiri bára mé à kúmma, ò laasun vīro. Ò ń í, de ò ń kũkũ ò ń dede yāime. Oni kakate lán nòbɔnɔ bà, <sup>13</sup> oni a vāni kũ ò kè fina boñne. Dāvānikεna fānantē dì keñne nna. Gɔɔ kũ òten pò ble kǎáo, òdi pɔnna ke kũ ń pónidenanɔ. Nĩ kunna á té bi mamberumε kũ gbāsĩo. <sup>14</sup> Zinakεna kú ń wéa, durunnakεna dì mɔ́mɔro. Òdi manafiki ke gbē kũ Luda yā dí zĩni péte ń gũnlonɔne. Wākũ ń swèε blè. Luda lé kèñnemε. <sup>15</sup> Ò sǎte, ò kè zé súsua, ò zé dokɔnɔ sè kũ Bεɔ né Balamu kũ à ye ɔ̀gɔ vāni lenaai. <sup>16</sup> Zaaki pòlebũnu'ina yā òne lán bisāsiri bà, à kpàkèi a vānikεna yā musu, à gĩne kũ

a yōnkəkēnaao. <sup>17</sup> Gbē abirenɔn de lán ísēboki kū ń í bàbano bàme, lán luku kū à gète kū ìao bà. Gusira níkinikin Luda dìteńne yàri ũ. <sup>18</sup> Òdi ìa kori zōkō dā, òdi ɔndō ke gbē kū ò bō sātēna zén dufunone kū dāvāniyāo kū wé'isariyāo. <sup>19</sup> Yā kū àdi ń yaka zòno me ń ũ, akū òdi gōna zīdadeno ũ lé séńne. Zaakū gbē sīnda pínki bi yā kū à a swèe blèe zòome.

<sup>20</sup> Tó ò bō andunia yāgbāsīkenan ó Dikiri ó Surabari Yesu Kirisi dōnaa gāi, akū ò tò yā pìi era à ń daguraa kè, à ń swèe blè, ń kunna kpede vāni de a káakupola. <sup>21</sup> Tó odi yāpura zé dō yāro, de abirekū manańne de kū ò dō, gbasa ò kpè lè Luda yā kū ò dàńnenela. <sup>22</sup> Yáasi kū ò kè díkínano pàpa ń musu yāpura: Gbēda dì era a pisii. Leme dō: Alede kū ò a zú ò dì era à mátamate bokotomme.

### 3

#### *Dikiri sugoro zī*

<sup>1</sup> Ma gbē yenyīdeno, takada plade kū ma kèáren dí. Takada mèn pla pínki pìno gūn ma yā dōágu de à vu in kū laasun manaome. <sup>2</sup> Má ye yā kū Luda annabino ò yāno dōágu kū yā kū ó Dikiri ó Surabarii dìte a zìrinone ò óáreo. <sup>3</sup> Àgō dō zaa káaku kū goro kpede zī zīdapoyeinakerino nì su ò á fobo <sup>4</sup> ò pi: Àdi a suna lé séroo? À kú máa? Ó deno gā, ama pō sīnda pínki kú a gbèn zaa lākū Luda andunia kàte nàme. <sup>5</sup> Kū Luda yā ò yā à musu kū anduniao kè, ò yā pìi kpà sākoto. À zīte bō ín, à a kè í pìi gāime, <sup>6</sup> akū í pìi dà andunia káakupola, à a kàkate. <sup>7</sup> Luda yā'ona dokōno pì mé à tò musu kū andunia tera

dío ditena té pò ũ ari gɔɔ kũ ani yãkpatε ke kũ a yãdarisarinɔ, à ñ kakatε.

<sup>8</sup> Ma gbẽ yenyĩdenɔ, àsun tó yã díkĩna sãáguro: Gɔɔ do de Dikirine lán wè wàa sɔɔro bàme, wè wàa sɔɔro sɔ denε lán gɔɔ do bàme. <sup>9</sup> Dikiri mɛfɛ vĩ kũ yã kũ à a lé sè kennaao lákũ gbẽkenɔ ten da nàro, àten mena ke kãáome. À ye gbẽke kakatero, à ye gbẽ sĩnda pínki nèse litεme. <sup>10</sup> Dikiri sugɔɔ nigɔ de lán kpãni suna bàme. Zĩ birea musu ni gɛte fioo, a pónɔ ni té kũ ò pia, zĩte kũ pò kũ ò kú a gũnnɔ nigɔ kun doru. <sup>11</sup> Zaakũ pò sĩnda pínki ni kakatε le, gbẽ kpate burin ániɔ de a ũu? À tó á kunna gɔ adona ludayámarinɔ ũ <sup>12</sup> wédɔna a sugɔɔi, à wé tã gɔɔ pì ká likalika. Zĩ pìia musu ni té kũ, a puusu wána ni a pónɔ yó. <sup>13</sup> Ókɔnɔ sɔ, ó wé dɔ ludambε dufu kũ zĩte dufuooi kũ Luda a lé sèwεε. Gwen manakena nigɔ kún.

<sup>14</sup> Abire yáime ma gbẽ yenyĩdenɔ, á wédɔna gɔɔ pìii gũn à kokari ke àgɔ kun mamberu sari taari sari, àgɔ nna kũ Luda. <sup>15</sup> À ó Dikiri menake dite surabana ũ, lákũ ó gbẽ yenyĩde Pɔlu takada kèáre nà kũ òndɔ kũ Luda a gbào. <sup>16</sup> Yã pìnɔn Pɔlu ò takada kũ à kènɔ gũn pínki. A takada pì gukenɔ dɔro dɔna zĩ'ũ. Wésiradenɔ kũ gbẽ kũ ñ zena gbãnaronɔ di yã pìnɔ lite kpɛdangara, lákũ òdi ke nà kũ Luda yã takada kparanɔ. Len òdi ñ zĩda da kakatenan le.

<sup>17</sup> Ákɔnɔ sɔ ma gbẽ yenyĩdenɔ, lákũ á yã pì dɔ nà kò, à laakari ke, de dokadarisarinɔ sún á sãte kũ ñ ékeoro. Àsun bo á zena gbãnan à létero. <sup>18</sup> Àgɔ gbã ó Dikiri ó Surabari Yesu Kirisi gbẽke kũ a dɔnaao gũn. Ákũ mé à gakuri vĩ tera ari gɔɔ sĩnda pínki!

Aami.

**Luda yá takada kú Bisá yáo**  
**Portions of the Holy Bible in the Busa language of**  
**Nigeria**

copyright © 2005 SIM International

Language: Bisá (Busa)

Translation by: SIM

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-10-10

---

PDF generated using Haiola and XeLaTeX on 11 Nov 2022 from source files dated 9 Oct 2020

8631d380-7d17-5581-abf9-174814e8ccc3